

Bin Adorá HESUS

E storia di Pasku ta un relato presioso, bunita, sentimental. Nos ta kòrda e stal, e pesebre, e angelnan, e wardadónan di karné, e strea, e sábianan. Ma ningun ta destaká den e storia mas ku Hosé, Maria, i e Beibi. Maske esei ta e kaso, nos no mester bruha i venerá e pèrsona robes. Pasku ta un bon oportunitat pa evaluá ken di bèrdat ta esun mas importante den bo bida.

Beibel no ta laga duda ku **solamente e Beibi ku a nase ta meresé nos adorashon**. Segun Skritura, ora e sabionan a yega, nan a adorá HESUS. “*I nan a bai den e kas i a mira e Mucha huntu ku su mama Maria; i nan a tira nan kurpa abou na suela i a ador’E*” (Mateo 2:11). Klaramente nan a rekonosé Hesus—no Maria òf Hosé—komo Esun ku ta digno di adorashon.

Palabra di Dios ta kategóriko: “*Adorá SEÑOR bo Dios, i sirbi E so*” (Mateo 4:10). Tòg bes tras bes Hesus a risibí adorashon (Mateo 8:2; 28:9,17; Juan 9:38; èts. En kontraste di Maria òf Hosé, **Hesus a risibí adorashon pasobra E ta Dios!**

Un saserdote katólíko, Charles Chiniquy, a konta di su kombersashon ku su obispu tokante Hesus i Maria.

“Mi señor, ken a salba nos riba krus?” El a kontestá, “Hesu-Kristo.”

“I ken a paga nos debe dor di drama Su sanger; tabata Maria òf Hesus?” El a bisa, “Hesu-Kristo.”

“Awor, mi señor, ora Hesus i Maria tabata na mundu, kua a stima pekadónan mas; tabata Maria òf Hesus?”

Atrobe el a respondé ku tabata Hesus.

“Tin pekadó ku a bin serka Maria pa ta salvá?” “Nò.”

“Bo ta kòrda si tabatin pekadó ku a bai serka Hesus pa ta salvá?” “Si, hopi.”

“El a reprendé nan?” “Nunka.”

“Bo ta kòrda ku Hesus a bisa pekadónan, ‘Bin serka Maria i e lo salvábo?’” “Nò,” el a respondé.

“Bo ta kòrda ku Hesus a bisa pover pekadónan, ‘Bini serka mi?’” “Si, El a bisa esei.”

“El a yega di desmentí e palabranan ei?” “Nò.”

“I ken, anto, tabata mas poderoso pa salba pekadónan?” mi a puuntra. “O, tabata Hesus!”

“Awor, mi señor, Hesus i Maria siendo na shelu, bo por mustrámi den Skritura ku Hesus a pèrdè algo di Su deseo i poder pa salba pekadónan, òf ku El a delegá e poder ei na Maria?” Obispu a kontestá, “Nò.”

“Anto, mi señor,” mi a puntra, “pakiko nos no ta bai serka E, E so? Pakiko nos ta invitá pover pekadónan pa bin serka Maria, ora, ku bo mes konfeshon e no tin nada en komperashon ku Hesus, den poder, den misericòrdia, den stimashon, i den kompashon pa pekadónan?” Pa esaki, obispu no tabatin kontestá, saserdote Chiniquy a relatá.

E angel a notifiká Hosé ku Maria lo duna lus na un Beibi milagroso, Dios mes. “*...dun’E e nòmber Emanuel, ku tradusí ta nifiká ‘Dios ku nos’*” (Mateo 1:23). Hesus—Hesus so—siendo Dios, durante Su bida nunca a hasi piká, a muri pa salba hende di nan piká, a resusitá, i ta sinta na man drech di Dios Tata. Ningun sino Hesus ta Mediadó entre Dios i hende, ningun otro por pordoná bo piká, kita bo kulpa di piká, salvábo di kastigu eterno pa piká na fièrnu, dunábo un bida kompletamente nobo, duna trankilidat i pas duradero den bo bida, duna entrada serka Dios, tende i kontestá bo orashon, i pidi Dios pa bo.

Sin duda Hesus ta e Pèrsonahe sentral di Pasku. E Beibi di Bètlehèm ta Kristo di Kalvario ku a tuma kastigu pa piká di esnan ku ta **konfi’E SO** pa salbashon. E ta meresé bo adorashon.

Na temporada di Pasku—i e otro 364 dia di aña—hasi méskos ku e sabionan: **ADORA HESUS SO.** Ningun otro ta digno di bo adorashon!